

Café Rumantsch cun la directura dad RTR

■ (rtr) Tge vegn apprecià da l'offerta da Radiotelevisiun Svizra Rumantscha (RTR)? Tge fa plaschair? Tge va sin la gnerva? A partir dal november 2016 organisescha RTR ensemen cun la Lia Rumantscha (LR) la seria «Café Rumantsch cun la directura». Cun questa chaschun dat la directura dad RTR Ladina Heimgartner pled e fatg a las visitadras ed als visitaders. Emprender d'enconuscher tar petta e café l'interpreta da medias RTR e tschentar dumondas a la directura: A partir dals 23 da november organisescha RTR ensemen cun la LR ils «Cafés Rumantschs cun la directura». Tant il 2016 sco er il 2017 han lieu en las regiuns mintgamai duas da quellas sentupadas cun la directura dad RTR. Ladina Heimgartner vul eruir dals giasts tge ch'els pensan dad RTR, tge emissiuns che plaschan spezialmain e tgeninas pli pauc, tge che manca en l'offerta dad RTR, tge che fa plaschair e tge main: «Ils collegas dad SRF han lantschà cun success il format da radio e televisiun 'Hallo SRF'. Era nus tschertgoin il barat cun il public – ma nus faschain quai sin nossa moda e maniera rumantscha: En las regiuns en empernaivla cumpagnia cun noss public. Quasi al tavulin, ma cun café enstagl da la biera», di Heimgartner.

Temas plain tensiun e tgira da linguatg

Ils giasts han natiralmain er la pussaivladad da vegnir a savair fatgs da la chasa da medias rumantscha RTR: P. ex co RTR tgira e promova lingua e cultura en il Grischun, con impurtanta che la qualidat dal program è per RTR e tge plans che RTR ha per il futur. Cun quella chaschun n'intervegnan visitadras e visitaders betg

mo ina massa davart RTR, mabain tgeran er il rumantsch. «Il Café Rumantsch vegn apprecià tant dals giasts sco era dals indigens. Gronda accoglientscha chatta cunzunt er il curt referat a l'entschatta da mintga Café Rumantsch. I dat dumondas e discussiuns, impuls e propostas, i vegn sviluppà ideas ed opiniuns, detg curt: Il barat tranter ils participants è adina viv ed interessant», di Carmen Dedual,

manadra regiuns tar la LR. Cun ils Cafés Rumantschs porscha la LR gia dapi pli ditg l'ocasiun da discurrer ensemen rumantsch e da discutir dals pli differents temas.

Ils termins 2016:
ils 23 da november a las 10.00, Scuol, Pizzeria Taverna
ils 7 da december a las 16.00, Savognin, Hotel Bela Riva



La directura dad RTR Ladina Heimgartner dat pled e fatg a las visitadras ed als visitaders dal Café Rumantsch.